

Noticia
Transparente
di Gobierno

ISLA ONLINE

Diamars 2 Juli 2024

Email: IslaOnline@gobierno.aw Tel: 528-4952



**STABILIDAD
Y
PROSPERIDAD**
2 0 2 4

Gabinete Wever-Croes



PROME MINISTER

Evelyn Wever-Croes

PROME MINISTER A ATENDE E ACTO CEREMONIAL DI TRASPASO DI MANDO PRESIDENCIAL NA PANAMA

"Un momento super oportuno pa estrecha lasonan y realisa e deseo di ta mas fuerte posiciona"



Dialuna ultimo, den oranan di merdia y atardi, Prome Minister Evelyn Wever-Croes tabata presente na e acto ceremonial di traspaso di mando presidencial na Panama, entre e Presidente saliente, señor Laurentino Cortizo y e Presidente nobo señor José Raúl Mulino. Despues di e ceremonia, esnan presente tabata tin e oportunidad di saluda y combersa un poco cu Presidente Mulino y e Primera Dama.

Presente na e ocacion special aki tabata Rey Felipe VI di Spaña, y presidentenan di Colombia, Republica Dominicana, Costa Rica, Honduras, y di Barbados. Tambe tabata presente Prome Ministernan di Aruba y di Belize y Vice-Presidente di Guatemala y El Salvador.

Un di e metanan di Gobierno di Aruba ta pa posiciona Aruba como un pais fuerte den region, pa asina logra ta poco mas independiente di Hulanda. P'esey eventonan asina, na unda Aruba tin e oportunidad di estrecha lasonan cu otro pais ta di suma importancia. Prome Minister a indica cu e acto ceremonial aki tabata un momento super oportuno pa por a cera conoci y combersa cu e representantenan di e paisnan presente, pa asina estrecha lasonan y realisa e deseo di ta mas fuerte posiciona.

Prome Minister, den nomber di Aruba y di Reino, ta desea Presidente José Raúl Mulino y henter e pueblo di Panama hopi exito y tur cos bon den e periodo nan dilanti. ■■■

Prome Minister Evelyn Wever-Croes:
Hulanda tin gobierno nobo

GABINETE SCHOOF I A HURAMENTA
DIAMARS DIA 2 DI JULI



Diamars mainta, 2 di juli, Su Mahestad Rey Willem Alexander a nombra e Gobierno nobo di Hulanda. Gabinete Schoof I a huramenta na Paleis Huis ten Bosch. E gabinete nobo ta wordo forma door di PVV, VVD, NSC y BBB y ta consisti di 16 minister y 13 secrectario di estado. Minister President y Minister di Asuntonan General nobo ta Señor Dick Schoof. Secretario di Estado pa Relacionnan den Reino ta Zsolt Szabó.

Prome Minister Evelyn Wever-Croes den nomber di Gobierno di Aruba y di Aruba en general ta desea Premier Schoof y henter



su gabinete hopi sabiduria y hopi exito den nan gobernacion. “Mi ta sigur cu nos lo tin un cooperacion fructifero cu Prome Minister Schoof, Secretario di Estado Szabo y demas miembro di e gabinete”, Prome Minister a expresa. ■■■



E PROME PRESUPUESTO SUPLETORIO PA AÑA 2024 A KEDA APROBA PA 12 PARLAMENTARIO

Extra entrada a wordo aloca pa yuda varios grupo den comunidad



Siman pasa diahuebs Parlamento di Aruba a trata e Ley di e prome Presupuesto Supletorio pa aña 2024 y esaki a keda aproba pa 12 Parlamentario. Den e Presupuesto Supletorio a aloca e extra entrada realisa pa crecimiento economico y tambe door di compliance, cu ta cumplimento cu pago di impuesto. E extra entrada awo ta wordo aloca pa yuda varios grupo den comunidad.

COSTO DI BIDA

Pa yuda cu costo di bida creciente, den e prome Presupuesto Supletorio di aña 2024 tin fondo reserva pa indexering pa empleado publico, subida di bijstand pa persona cu limitacion y subida di e reparatietoeslag pa trahadonan cu un salario bou 2500 florin y e pensionadonan tambe lo bolbe haya un aumento despues cu na januari 2023 nan reparatietoeslag a wordo subi cu 45 florin.

Minister Xiomara Maduro

VARIOS PROYECTO

Den e Presupuesto Supletorio a haci cambio pa asina por logra financia algun proyecto na beneficio di nos comunidad. Por menciona e Delta Plan Ouderen, trabounan na Parke Curason, Palo Marga, Stadion Guillermo Prospero Trinidad, Leerorkest, Loket Plan di Mayor y fondonan pa renobacion di Cas di Cultura. Tambe tin fondonan cu Aruba ta haya di Hulanda pa asina por hiba acabo proyectonan di Landspakket, manera e Huisartsenopleiding, cu tambe ta keda integra awo den Presupuesto 2024.

GRADICIMENTO

Minister Maduro di Finansa ta gradici e ekipo financiero y legal di Gobierno di Aruba pa nan trabou duro haci pa por optimalisa e proceso presupuestario di nos Pais. E mandatario ta felicita colega Ministernan di Gabinete Wever-Croes y ta gradici Parlamento di Aruba pa e debate y a aprobacion di e cambionan den e prome Presupuesto Supletorio di Pais Aruba pa aña 2024.



A HACI PALABRACIONNAN CONCRETO DURANTE E JUSTITIEEL VIERLANDEN OVERLEG NA HULANDA

E siman tras di lomba tawata uno exitoso segun minister di husticia y asuntonan social sr. Rocco Tjon, kende tawata presente na e Justitieel Vierlanden Overleg na Hulanda. Esaki ta e plataforma caminda tur cuater minister di husticia di reino ta bin hunto pa asina discuti diferente topiconan. Topiconan cu ta toca e parti di combati criminalidad organisa, prevencion pa loke ta criminalidad bou di nos hobennan, kustwacht, ministerio publico, corte comun, pero tambe e plataforma nobo cu a wordo introduci pa loke ta un colaboracion estrecho entre tur e hefenan di inmigracion den reino.

Durante e reunnionan tras di lomba, a haci palabracionnan concreto, caminda a dicidi cu kustwacht ta bay wordo amplia pa Aruba, esaki ta nifica cu lo conta cu 20 funcionario adicional pa asina fortifica e departamento aki, cu consecuentemente por percura pa mas seguridad na nos frontera. Banda di esaki, e colegio di Alto Comisaronan di polis a haya 3.5 miyon euro aloca, pa di e forma aki por sigui fortifica e diferente departamentonan hudicial.

Tambe, e proposicion di parti di Aruba pa introduci un plataforma regional caminda e hefenan di Inmigracion ta bay traha mas di serca hunto tambe a wordo aproba, pues lo bay inicia e parti aki. Esaki, no lo toca e parti operacional so, pero tambe e parti pa e experticio sigui wordo amplia.

Pa loke ta trata e parti di cuido forensico, e decision a wordo tuma pa establece e proposicion pa Hulanda cubri e gastonan pa e siguiente cuater pa cinco aña, pa asina por bin cu un program manager, pa di e forma ey e parti di cuido forensico den reino tambe haya mas atencion.

Por ultimo, manera ta conoci, april ultimo tawata tin un congreso grandi riba e tema di cuido forensico na Curaçao, caminda tur minister di husticia di reino a participa y diferente palabracion a wordo haci entre tur stakeholder. E ta importante pa esaki wordo ankra a base di un plan a largo plaso, pa asina e tema aki por keda haya su debido atencion. ■■■





9 STUDIANTE DI ARUBA A RICIBI BECA DI REINO



Diabierna ultimo, a tuma luga presentacion di nueve (9) estudiante cu lo haci uzo di e prome Beca di Reino (Koninkrijksbeurs). Entrante 1 di september proximo e studentenan lo cuminsa cu nan intercambio di estudio of pasantia na un di e paisnan den Reino Hulandes. Manera ta conoci, na luna di januari 2023, Minister di Enseñansa saliente di Hulanda Sr. Robbert Dijkgraaf tabata na Aruba, unda cu a anuncia e proyecto di Beca di Reino. “Hulanda a aproba 500 mil Euro pa aña pa e Koninkrijk Mobiliteit Beurs. E intercambio aki ta brinda e studentenan di EPI y Universidad di Aruba e oportunidad pa haci nan pasantia of intercambio di estudio di seis (6) luna na Hulanda.

E ora e estudiante ta mas sigur si nan a gusta Hulanda pa continua cu nan estudio. E Beca di Reino ta un programa di movilidad pa tur estudiante den Reino Hulandes y ta diseña pa haci posibel e intercambio di estudiante pa un tempo cortico, asina e di porcentahe di exito mucho mas halto”, Minister Endy Croes a subraya. Esaki cu e meta pa evita dropout y desapunto na momento cu e estudiante scoge pa haci un estudio completo den exterior. Despues di tur e trabounan realisa a otorga na 9 estudiante, di cual 8 di EPI y 1 di Universidad di Aruba e Beca di Reino pa bay Hulanda cu tur gasto paga.

Otro aña lo tin 120 cupo disponibel entre Curaçao, Sint Maarten y Aruba pa e proyecto aki. “Mi kier motiva e studentenan di IPA, EPI y Universidad di Aruba pa aplica na tempo e Beca di Reino pa bin na remarke den e proximo grupo”, Minister Endy Croes a expresa. Por ultimo, e mandatario di Enseñansa y Deporte ta gradici coleganan Minister di Reino Hulandes, specialmente Minister di Enseñansa saliente di Hulanda Sr. Robbert Dijkgraaf pa haci e proyecto aki posibel. Tambe Minister Endy Croes ta gradici e stuurgroep, Departamento di Enseñansa, IPA, EPI y Universidad di Aruba pa nan excelente colaboracion y trabou di ekipo. “Masha pabien na e studentenan y hopi exito na Hulanda”, Minister Endy Croes a termina.

EN CUADRO CU PEL, MINISTER ENDY CROES TA FELICITA 44 EMPLEADO CU A RICIBI NAN CERTIFICADO DI BEROEPSPRAKTIJKVORMING



Diabierna ultimo, Minister di Enseñansa y Deporte Endy Croes hunto cu Prome Minister Evelyn Wever-Croes a acudi na Auditorium di Colegio EPI, en conexion cu proyecto di Plataforma Enseñansa y Labor (PEL). Sra. Eddelyn Dijkhoff, kende ta encarga di e proyecto aki tambe tabata presente. Den e ocasion aki a entrega certificado na alrededor di 44 empleado di 22 compania cu a participa den e “Beroepspraktijkvorming” di Plataforma Enseñansa y Labor (PEL).

E meta di esaki ta pa tin un miho acoplacion entre enseñansa y necesidad di mercado laboral, preparando nos studiantenan na e nivel cu mercado laboral ta exigi. Pa motibo aki a bin cu e training di BVP, unda e companianan por guia e stagiairnan di scol practico (beroepsonderwijs) di entre otro, Openbare Avondleergangen Aruba (OAA), Educacion Profesional Basico (E.P.B.) y Colegio EPI di un forma mas eficiente. Cu e curso aki e companianan tin e conocimiento pa guia e stagiairnan di e forma corecto.

E mandatario di Enseñansa a gradici Sra. Eddelyn Dijkhoff pa e gran trabou el a desplega durante 20 aña na Colegio EPI y a dese’e hopi exito cu e proyecto di PEL. Ademas di esaki, a introduci Sr. Ninon Swean cu lo bay tuma e posicion di Sra. Dijkhoff na Colegio EPI. Minister Endy Croes ta gradici tur cu a contribui den e proyecto di Plataforma Enseñansa y Labor. Alabes, ta felicita e 44 empleadonan cu a ricibi e certificado pa e training di “Beroepspraktijkvorming”.



MINISTER ENDY CROES A PRESENCIA GRADUACION DI SCOL PRACTICO PA OFISHI (S.P.O.) BRAZIL

A otorga diploma na 26 graduado



Diasabra anochi, den un esfera festivo na Occasion Ballroom a tuma luga Ceremonia di Graduacion di e alumnonan di S.P.O. Brazil. E atardi ameno a inicia cu presentacion di baile di e grupo Kids & Youth in Action, sigui pa himno di Aruba. Despues a sigui cu discurso di director di e scol Sr. Mark Thiel y Minister Endy Croes cu a felicita e graduadonan cu e logro aki. Minister Endy Croes a subraya cu e resultado ta danki na esfuerzo, disciplina, dedicacion y determinacion di e alumno pa por a logra e diploma. Kisas e no tabata facil, tabatin hopi reto, tabatin dia mas dificil cu otro, pero un a pusha otro cu awe boso a logra! Ta deber di Gobierno di Aruba pa crea un plataforma pa brinda oportunidad na tur alumno pa por educa y prepara nan mes pa futuro.

“Nos ta contento cu e grupo di graduado aki, a haci un bon uzo di e oportunidad”, Minister Endy Croes a expresa. Manera ta conoci siman pasa, Minister Endy Croes a anuncia cu desde aña escolar 2024 -2025 S.P.O. ta continua cu aña 4 y 5. E meta di proyecto aki ta pa ofrece e alumnonan cu termina S.P.O. un alternativa pa sigui studia, momento cu nan no por continua nan estudio na E.P.B. A inicia e proyecto aki pa motibo cu e alumnonan di S.P.O. ta demasiado hoben (average di 15 aña), momento cu nan termina S.P.O. y no ta cla pa drenta mercado laboral. Ademas di esaki, no tin suficiente tempo pa nan por acumula experiencia di pasantia.

E 26 graduadonan ta consisti di 20 alumno di e Trayecto Regular, cual 12 a termina nan estudio den e sector di Horeca / Administracion y Comercio y 8 a finalisa den e sector di Tecnica / Cuido di Mata y Bestia. Un total di 6 estudiante a caba e Trayecto cu Guia (IPO), cual 2 a termina den sector Horeca / Administracion y Comercio y 4 den e sector Tecnica / Cuido di Mata y Bestia. E miho graduado di S.P.O. ta Loudrick Arendsz y e miho graduado di Trayecto cu Guia Julaika Elien. Despues di e bunita ceremonia e hoben talentoso J-Vion a deleita esnan presente cu un magnifico presentacion di mariachi.


Den number di Gabinete Wever – Croes II, Minister Endy Croes a felicita e graduadonan. Alabes, Minister Endy Croes ta gradici director Sr. Mark Thiel, staf, mentor, docente- y mayornan cu a contribui den e logro di e graduadonan y desea tur graduado hopi exito den nan futuro. Nos ta orguyoso di boso!



MINISTER ENDY CROES TA FELICITA E ALUMNONAN DI AÑA 3 DI SCOL BASICO CU A HAAL NAN EXAMEN DI LANDAMENTO CU EXITO

Dialuna ultimo, Minister di Enseñansa y Deporte Endy Croes a acudi na Piscina Olimpico Roly Bisslik na Savaneta, unda e alumnonan di aña 3 di scol basico a haci nan examen di landamento. Un proyecto cu a inicia mas di 30 aña pasa, unda ta brinda tur alumno di aña 3 di scol basico les di landamento un (1) bes pa siman y ta haya nan diploma final di aña escolar.

Un total di 700 pa 800 alumno di tur scol basico a haci e examen di landamento na Aruba. Minister Endy Croes ta gradici tur instructor di landamento pa nan dedicacion, pasion y amor durante cada les. Alabes, ta felicita tur mucha cu a haal nan diploma di landamento cu exito e aña escolar aki.



2024

AÑA DI STABILIDAD Y PROSPERIDAD



Gabinete Wever-Croes

Arte di Muraya ta un expresion di creatividad sin limite cu ta transforma murayanan di San Nicolas den un galeria bibo cu ta conta historia, transmit emocion y tambe ta stimula e orguyo di un comunidad.

